

## **ԳՐԱԴԱՐԱՆԱՅԻՆ ԱՍՈՑԻԱՑԻԱ**

### **ՀԱՅԿԱԿԱՆ ԳՐԱԴԱՐԱՆԱՅԻՆ ԱՍՈՑԻԱՑԻԱ 2024**

*(Հիմնադրման 30-ամյակի առիթով)\**

**ՀՏԴ: 02:061(479.25)**

### **ՄԱԴԼԵՆ ՀՈՎՍԵՓՅԱՆ**

***Խնկր Ապոր անվան ազգային մանկական գրադարան***

2024 թ. հոբեյանական էր «Հայկական գրադարանային ասոցիացիա» /ՀԳԱ/ հասարակական կազմակերպության համար. լրացավ կազմակերպության հիմնադրման 30 ամյակը:

1994 թ. հոկտեմբերի 7-ին ծնունդ առած կազմակերպության նախաձեռնողները Հայաստանի Հանրապետության խոշոր գրադարանների ներկայացուցիչներն էին: Այն նպատակ ուներ համախմբել հանրապետության գրադարանային աշխատողներին՝ մասնագիտական հարցերի լուծման, գրադարանային գործի բարելավման և զարգացման համար:

Տարիների ընթացքում ասոցիացիան հանդես եկավ մի շարք կարևոր նախաձեռնություններով, որոնք նրան ճանաչում բերեցին: Կազմակերպվեցին կոնֆերանսներ, գիտաժողովներ, կլոր սեղաններ, քննարկումներ, որոնք առնչվում էին գրադարանային տարբեր խնդիրներին:

Ոլորտն ավելի ակտիվացավ, երբ 2004 թ. հոկտեմբերի 7-ը Հայաստանում ընդունվեց որպես Գրադարանավարի օր: Հետզհետե ընդլայնվող ծրագրերի իրագործման հետ մեկտեղ ավելի սերտ դարձավ համագործակցությունը պետական և հասարակական տարբեր

---

*\* Հոդվածը ներկայացվել է 24.11.2024, ընդունվել է փոպագրության 19.12.2024:*

*The article was submitted on 24.11.2024, accepted for publication on 19.12.2024.*

## ԳՐԱԴԱՐԱՆԱՅԻՆ ԱՍՈՑԻԱՑԻԱ

կազմակերպությունների, ՀՀ մարզային և համայնքային գրադարանների հետ: Ընդգծելով ասոցիացիայի անցած 30-ամյա ուղին՝ անդրադառնանք 2024 թ. ձեռքբերումներին:

Տարին մեկնարկեց արդեն ավանդական դարձած «Ազգային գրադարանային շաբաթ - 2024» /ԱԳՇ/ ծրագրով, որն անցկացվեց «Գրադարանը նորարարության հարթակ» կարգախոսով ապրիլի 15-22-ը: Շաբաթվա շրջանակներում անցկացվեց 12 խոշոր միջոցառում՝ կլոր սեղան, գրքի շնորհանդես, վարպետության դաս, դասախոսություն, մասնագիտական և ճանաչողական այցեր ՀՀ մարզերի և Երևանի տարբեր բնույթի գրադարաններ: Թողարկվեց «Լրատու հայկական գրադարանային ասոցիացիայի» էլեկտրոնային հանդեսի 3-րդ համարը /2024 թ. 1-ի համարը/, որի շնորհանդեսն անցկացվեց ԱԳՇ-ի շրջանակներում, Խնկո Ապոր անվան ազգային մանկական գրադարանում: Հանդեսի համարներում տեղ են գտել բազմաթիվ մասնագիտական հոդվածներ, որոնց հեղինակները Հայաստանի տարբեր գրադարանների աշխատակիցներն են ու ոլորտի մասնագետները:

Կարևորելով համայնքային գրադարաններում առկա խնդիրները՝ ասոցիացիայի վարչությունը կազմակերպեց կլոր սեղաններն արկում հրատարակիչների և Երևանի համայնքային գրադարանների գրադարանավարների մասնակցությամբ: Քննարկման ընթացքում բարձրացված խնդիրների՝ հատկապես գրադարանային հավաքածուների համալրման և գրադարանավարների վերապատրաստման վերաբերյալ եղան մի շարք առաջարկներ: Արդյունքում՝ ՀԳԱ նախագահ Ռուզան Տոնոյանը համապատասխան գրություն հղեց Երևանի քաղաքապետին՝ ի պատասխան ստանալով դրական արձագանք:

Մասնագիտական կարևոր նշանակություն ունեն «Կլոր սե-

## ԳՐԱԴԱՐԱՆԱՅԻՆ ԱՍՈՑԻԱՑԻԱ

ղան գրադարանավարների համար» սեմինարը՝ Շենգավիթ վարչական շրջանի թիվ 32 գրադարանում, որին մասնակցեցին նաև շրջանի թ. 16, 17 և 18 գրադարանների տնօրեններն ու գրադարանավարները: Հայկական գրադարանային ասոցիացիայի փոխնախագահ, գրադարանագետ-մատենագետ Ռաֆիկ Ղազարյանը ուղղորդեց գրադարանավարներին ճիշտ հիմքերի վրա դնել գրադարանային աշխատանքները: Դրան հաջորդեց Երևանի Նոր Նորք վարչական շրջանի Համո Սահյանի անվան գրադարանում կայացած մասնագիտական հանդիպումը:

Նման նպատակ էին հետապնդում նաև ասոցիացիայի նախագահ Ռուզան Տոնոյանի և փոխնախագահ Ռաֆիկ Ղազարյանի կատարած այցերը Գառնիի արվեստի, մշակույթի, սպորտի կենտրոնի, Երևանի Շենգավիթ վարչական շրջանի Շուշանիկ Կուրդինյանի անվան հ. 17, 16, 32 համայնքային գրադարաններ: Այցի ընթացքում քննարկեցին մի շարք հարցեր գրադարանների գործունեության, հնարավորությունների, արդի մարտահրավերների շուրջ: Անդրադարձ կատարվեց նաև «Գրադարանների և գրադարանային գործի մասին» օրենքում կատարված փոփոխություններին, ինչպես նաև ոլորտի զարգացման հեռանկարներին ու նոր հնարավորություններին: ՀԳԱ վարչության անդամ, ՀՀ ԳԱԱ Հիմնարար գիտական գրադարանի գիտական ղեկավար Տիգրան Զարգարյանի անցկացրած սեմինարները ՀՀ մարզային գրադարաններում /Արարատ, Արմավիր, Վանաձոր/ նվիրված էին արհեստական բանականության թեմային և նորագույն տեխնոլոգիաների ներդրմանը գրադարաններում:

Որպես գրադարանային ոլորտի զարգացման էական բաղադրիչ համարելով մասնագիտական շարունակական կրթությունը՝ Հայկական գրադարանային ասոցիացիան այս տարի ևս իրական

## ԳՐԱԴԱՐԱՆԱՅԻՆ ԱՍՈՑԻԱՑԻԱ

Նացրեց «Գրադարանավարների վերապատրաստման դասընթացներ» ծրագիրը: Մայիսի 20-24-ը և հունիս 3-7-ը կայացած դասընթացներին մասնակցեց Արտաշատի և Երևանի համայնքային գրադարանների 24 աշխատակից: Հնգօրյա դասընթացների ընթացքում ոլորտի փորձառու մասնագետները մասնակիցներին փոխանցեցին գրադարանային գործի տարբեր գործառույթների վերաբերյալ համապատասխան գիտելիքներ և գործնական հմտություններ: Մասնակիցներին տրվեցին վկայականներ:

Իր տեսակով առանձնահատուկ և կարևոր նախաձեռնություն էր «Հայկական գրադարանային ասոցիացիա» հասարակական կազմակերպության 2024 թ. հայտարարված մրցույթը՝ «Լավագույն գրադարան» անվանակարգում (ՀՀ կրթության, գիտության, մշակույթի և սպորտի նախարարության աջակցությամբ): Նպատակը գրադարանների հանրայնացումն էր, լավագույն աշխատանքների խրախուսումը, գրադարանի և գրադարանավարի դերի կարևորումը, ընթերցանության խթանմանը միտված նորարարական գաղափարների ներդրումը: Մրցույթն անցկացվեց 6 անվանակարգերում: Մասնակցեց Հայաստանի տարբեր բնույթի 70 գրադարան: Արդյունքներն ամփոփվեցին հոկտեմբերի 7-ին՝ Գրադարանավարի օրը, Խնկո Ապրո անվան ազգային մանկական գրադարանում: Հաղթողներին տրվեցին մրցանակներ, պատվոգրեր, գրքեր: Նման նախաձեռնությունը, հուսանք, ոգևորիչ նշանակություն կունենա և խթան կհանդիսանա՝ աշխատանքները լավագույնս դարձնելու համար:

Ամփոփելով անցնող 2024 թ. կատարված աշխատանքները և գրադարանային ոլորտի արդի խնդիրները՝ «Հայկական գրադարանային ասոցիացիա» հասարակական կազմակերպությունը նախատեսում է գալիք 2025 թ. իրագործել Հայաստանում գրադարանային գործի զարգացմանը միտված նոր ծրագրեր: